



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7



India team nung Sunil
Chhetri züngoksemogo

Gaza rara jembishinütsü atema
Marco Rubio Israel tongogo



VOL. XXII ISSUE NO. 332 (ADOK 332) DIMAPUR TENTONÜ (MONDAY) RONGJUI (SEPTEMBER) 15, 2025 ₹ 5.00

Chumoükedima aser Kohima tsüingda senzüsenbongtsü timtemer

Dimapur, September 14, 2025

(TYO): National Highway-29 kübok Pagala Pahar temeket nung anentsüh aluba ajanga garitem senzüba noktanga lir.

Chathe bridge aser New Chumoükedima tsüingda tesem aika nung anentsüh aluba ajanga Dimapur-Chumoükedima-Kohima tsüingda senzüsenbongba nung timtem ajurua lir ta traffic ketdangsür kati ashi.

Chathe ayong nung tzi danger level tema ayimer aser tzüinglu kanga aruba ajanga Chumoükedima o Seithekema sendaktepba apu ka ponger ogo.

Maneni, tzüinglu kanga aruba ajanga Dubagaon aser Khughovi sendaktepba bailey bridge ka metsüingbanga lir.

Külen, Deobarnü Dimapur nung ali tenemzük tesemtem nung tzmetsüing timtem ajuruba aser iba ajanga osetsüset aika raksaba osangtem angazüker.

Maneni, Mhainamtsii-Pimla lenmang nunga tesem aika nung anentsüh alua lir. NH 29 nung mesenzüdang iba lenmang ajanga Kohima len senzür.

Iba atema Peren district administration-i traffic tetuyuba ka agütsüogo.

Pimla -Mhainamtsii lenmang nung anepdang 6:00 ako nungi nikongdang 6:00 ako tashi senzüdaktsütsü ta ketdangsürtemi ashi.

Pimla nungi Mhainamtsi leni aoba gari tulutem (upto six-wheelers) nikongdang 6:00 ako nungi anepdang 12:00 ako tashi aser Mhainamtsi nungi Pimla leni aruba gari tulutem anepdang 12:00 ako nungi anepdang 6:00 ako tashi dang senzütsü melar ta Peren district administration-i metetdaktsüogo.

Niuland-Ghotovi-Zhadima lenmang nung gari tilatem dang senzüdaktsütsü.

Minister Ashwini Vaishnaw-i Tuli tashi trainatutsümapaasadangtsü nungloktsüogo

Mokokchung, 14th

September (TYO): Nagaland Lok Sabha MP, S. Supongmeren Jamir-i Minister of Railways, Information & Broadingcasting and Electronics & Information Technology Government of India, Ashwini Vaishnaw dang,

Train No. 15665 Guwahati - Mariani (BG Express) senzübaji Tuli tashi atutsü mepishiba dak sentakba nung concerned directorate dang iba mapaji kanga junga asadangtsü asoshi nungloktsüogo, ta Ashwini-i Supongmeren dang züluba shity nung shia liasü.

Maa Kamakhya ajanga Op Sindoor takok angu: PM Modi

Guwahati, September 14, 2025

(Agencies): Maa Kamakhya aser Lord Krishna temoatsü ajanga Operation Sindoor takok angu ta Prime Minister Narendra Modi-i September 14 nü ashi.

"Maa Kamakhya temoatsü ajanga Operation Sindoor takok tulu angu. Tanü ni Maa Kamakhya limai aruba atema balaka bilemer" ta Darrang nung Modi-i ashi.

Tanü pai Janmashtami benjungmung den külemi Darrang semdanga liasü.

"Red Fort nungi ni Chakradhari Mohan bilemteta ta shiogo. Ni Shri Krishna bilemtet aser nübortem tsüingdang security policy nung Sudarshan Chakra benoktsü shiogo" ta PM Modi-i ashi.

Taküm Independence Day onük jembidang PM Modi-i "Sudarshan Chakra Mission" indang metetdaktsü.

2035 tashi nung India security shield tajungba akümtsü aser ulushitsü indang sentong pai lemsatepa liasü.

"Linük nung tongtipang installations aser civilian areas kümzüka ayutsü atema India-i Iron Dome-mesükba defence system ka yangluba nung temulung agütsütsü. Iba tashitait system ajanga kiralongrartemi amakba noktanga dang masü saka kiralongrar amaktsü" ta pai ashi.

Tanü PM Modi-i Assam nung tongtipang mapatong aika sayatsü. Pai Darrang Medical College and Hospital, GNM School, aser B.Sc. Nursing College yanglutsü atema lung azüngtsü.

Modi-isa Guwahati Ring Road Project aser Brahmaputra temdanga Kuruwa-Narengi Bridge yanglutsü lung azüngtsüogo.

NE nung menoknok anak

Dimapur, September 14, 2025

(TYO): Deobar nikongdang Richter scale nung 5.9 magnitude asadangtetba menoknok ka Northeast nung anak.

Tanü nikongdang 4:41 ako nung Assam kübok Udalguri district tiyongtsü ser menoknok

anak ta Assam State Disaster Management authority-i ashi.

Iba osang zülü tashi nung nisungtem taküm akoksaba mesüra kiojen raksaba osang kecha mali. Iba menoknok ya Bhutan, Nepal aser Bangladesh linüktem nunga metetogo.

India nung mezüingbuba Bamboo-Based Ethanol Plant lapokogo

Guwahati, September 14, 2025

(Agencies): Prime Minister Narendra Modi-i Deobarnü India nung mezüingbuba bamboo-based ethanol plant lapoktsüogo.

Assam kübok Golaghat district nung PM Modi-i iba plant lapoktsü aser iba ajanga clean energy aser rural economic nung tajangzük alitsü.

Iba plant ya Assam Bio-Ethanol Private Limited (ABEL) ajanga yanglu. Parnoki ashiba agi alima nung iba ya zero-waste bioethanol plant mezüingbuba lir. Iba plant nung raw material ama green bamboo amshir.

Tanü Prime Minister Modi-isa Numaligarh Refinery nung Rs 7,230-crore polypropylene plant atema lung azüngtsüogo. Iba ajanga India'er energy roadmap nung Assam tashi itshitsü.

"India nung energy teimba nüngdaka akümer aser energy production nung asenok sasa peritsüla. Asenoki fossil fuel imports ajemtsüla" ta Modi-i ashi.

Alima nung rongsenketzüing tsütsü kanga kara ainba linüktem rongnung India ya ka lir aser bioethanol o solar energy amala green alternatives nung temulung agütsütsüla. Asenoki deep-water missions ajanga hydrocarbon exploration maneni inyaktsüla ta paisa ashi.

Golaghat district nung lapokba bamboo-based ethanol



Prime Minister Narendra Modi-i Deobarnü India nung mezüingbuba bamboo-based ethanol plant lapokba mapang tangokba noksa ngur

plant ajanga küm shia ethanol 48,900 metric tones yanglutettsü. Assam, Arunachal Pradesh, aser tanga northeastern state tem nungi aou 5 lakh tones shi amshitsü ta ketdangsürtemi ashi.

Iba plant nungsa acetic acid, furfural, aser food-grade liquid CO? adoktsü aser iba ajanga Assam-i Rs 200-crore shi ajangzüktsü.

Iba ethanol plant ya Numaligarh Refinery Limited (NRL), Finland nungi Fortum, aser Chempolis OY külemi inyaker.

"Taoba mapang Congress-i aniba sorkartemi aou ya süngdong ama züngok aser iba ajanga mamshiteti aru. Ajisüaka BJP-i aniba sorkari iba tenokdangba agien aser iba

ajanga nübortem aser lisopur aluyimertemi aou tsünüba ajanga tajangzük agütsür" ta PM Modi-isa ashi.

Modi-isa süngolu aluyimertem housing, health, aser education tajungba akümtsü atema welfare schemes tenzüksüba osang metetdaktsü.

"Taoba sorkartemi tea garden workers senzüka yutsü aser parnok tea company ketdangpurtem ket nung dang yutsü. Taoba sorkartemi süngolu nung mapa inyakerem nem temeten aser teyari magütsü" ta pai ashi.

Tanü sorkaribo süngolu ayimertemi nüngdakbatem tongtsütsü meranger aser welfare maparen balala inyaker, ta PM Modi-isa ashi.

Dr. Sentitula IFS-i "kü lima kü khu" dak rangloker Ao officer-tem ayongzük

Mokokchung, 14th

September: Asen Aor senso asoshi Mokokchung ya district HQ ka dang masü saka ya asen Aor sobaliba temulungjang ta metettsüla. Chungliyimti ya tar nung ertsü ka masü saka asenok lipok dak mongsong ta metettsüla. Asen lima ya alinük tesem ka dangbo masü saka ibai kong asen tetsü teboui rara, sarasadem, meim aser taküm tenla agütsü. Anungji, iba lima ya Kü meyong ta aseni meshitetra aser magizüktetra, asen lima nung asenok aiener süa alitsü. Item o ya Mokokchung DFO, Dr. Sentitula, IFS-i Ao Officers' Telungjem (AOT) tenteta mezüingbuba senden Mokokchung town hall nung akadang "kü lima, kü khu" AOT omen nung ajemdaker jembidang ayongzüka metetdaktsü.

Asen Aor ya Tsüngremi lenitsü mejeta shimtetba kin ka lir. Anungji tajung/tamajung, tatsü/talang tia ajak nung anitsü Pai asenok dak nungi akanger. Akhi mapang arju nungeri pei lima tajungtiba nung anitsü asoshi mapang ajak nung lungjemer tia/



Dr. Sentitula IFS-

tensa asadanga, tsüngküm/ mongpu züngdangteta asameyang, yamaji tanü asen loktiliba ya mangdang tasen, libaliru tajung aser ajak asoshi sümedem tanela nung anitsü nüngdaker. Na jenjang aser maongka kodika nung amener, padikaji nai nüburtem ajangzükdaktsütsüla aser anitettsü asoshi temoatsü khuret abentsüla. "Naga nunger rangben nungi ishikadi maongka angur rongnung na/ni densema lir, anungji aseni anir tasü itta mangdangbener asen lima asoshi khu abentsüji asen noklem lir",

ta lai ayongzük.

Asen tetsü oshi, asen apijemtsü shin o, jilushi, mulungzüing nung jembia aruba otsüolem sama-a aor. Asen chirnurtemi school nung English jembir, India lima jilatem balalai aodang Hindi jembir, süra shibai kidang Ao jembitsü? Asen chirnurtemi soyim ken aser tsurabur kensü nung kenten memetet, Senden Riju tetetzü mangashidang, asenoki tanü züzüa toktsüra putu ana (2 generations) sülenbo asen sobaliba mapatem ajak museum nung aser otsü kaketterem nung dang angutsü. Süra tanü asen putu tensa den apet asenoki taküm aliba rizüngdak (archive) kaket kisung nung dang masü saka digital nung otsütem tangoka ayutsüla, Chungliyimtiji taküm asangsang nung yimdangi arua ajangshitsü (virtual reality) asoshi yanglutettsüla. Ano otsüla oboula kentenmenü, jembishinü ajak podcast süa mangoka ayutsüla, ta laisa Ao kaketkeno aser oshioben wazüka ayutsü asoshi tebilemba kar lemsatep.

(Maneni tapak 2 nung...)

RMLCF-i NHAK nung azü agütsüba sentong ayongzük



Kohima, Rongjui/Sept. 14 (TYO): RML Cancer Foundation (RMLCF) ajanga Naga Hospital Authority Kohima (NHAK) den lungjemer azü agütsüba sentong mezüngbuba takok ngua Honibarnü agiogo. Iba sentong ajanga azü 42 pints bendena liasü.

Blood bank tashi itshitsü

aser emergencies, surgeries aser cancer ama mapang talanglang temang anepalur asoshi azü peria manguba tebilemtsü koktettsü nukjidong nung iba sentong ayongzuka liasü.

Nüburtemi azü agütsüba yimya ka ama kumdaktsütsü, aroki khuret bena aser temeim sayua ayongzükba sentong

nung imlaba dang nungi tali bendena liasü ta sentong ayonger temi ashi.

RML Cancer Foundation (RMLCF) ajanga ajanga volunteers aser azü agütsür ajunga dang pelaba lemsatop aser iba ama sentong yagi state nung nisung takum kumzükba aser healthcare tashi itshiba nung tongti shilem agitsü ta ashi.

Don Bosco College Kohima nung Bosco Gym semzükogo

Kohima, Rongjui/Sept. 14 (TYO): Don Bosco College Kohima nung Hokulbarnü Bosco Gym semzükba ajanga kaketshir aser tesayurtem tema anema alitsü asoshi tongtipang mera ka agir alitsü.

Iba sentong ya National & International Arm Wrestling Gold Medalist, Champion-Team winner (Pro Panja League Season 2, 2025), Avilie Zuyie aser Fusion Fitness gym

nungi ketdangsürtem arua moaja liasü.

Sentong tenzüka Fr. Dr. Tious Varghese, Principal, DBCK ajanga pela agizükba o jembidang iba Gym nukjidong ya kaketshir aser tesayurtem temang anema lidaktsütsü asoshi lir aser mental training facility ka ama lir, koba college-i lenla ajungalen terenlok lidaktsütsü atema inyakba nung shilem ka

lir ta ashi.

Iba sentong nung adener tem dang Bosco Gym facility nung aliba osettsüset amshiyim indang yimya aser temetetsü tem Fusion Fitness team nungi Vizovolie Victor Rame (Proprietor & Head Trainer), LC Sekhose (Brand Ambassador), Pusing H Longulam (Trainer), Meguo Yase aser Seyie Tsükhrü nungeri sayua liasü.



Bookipedia
FOUNDATION

AO OSHI RENLOKDAKTSÜBA Toktep Ayongzük-III

Yimdangjem Otsü Zülü Toktepba (Fiction Writing Competition)

KÉCHI INDANG OTSÜ ZÜLÜTSÜ?
Nisungtem asoshi tatishitsü aser tansütsü aketba otsü mashika zülutsü akok.

SHIBAI SHILEM AGITETTSÜ?
Tazüngba aser küm tasazük kecha mali tetsür tebur ajaki shilem agitettsü.

KOMA SHILEM AGITSÜ?
Yimdangjem otsüji ojang (word) teimtiba agi 4000 tashi nung zülutsüla.

**OTSÜJI TANGAR NUNGI AJIZÜKBA MASÜ, PEISASA YIMDANGI
ARUA BILEMA YANGLUBA OTSÜ KA ASÜTSÜLA.**

KONG KOMA YOKTSÜ?
Item tetoktepba nung shilem agirtemi MS Word/PDF nung tiriyim@gmail.com dangi pei tenüng den tetsü aser tebu tenüng, yim aser talidak tenüng den tongtepratepdak phone number dena zülur September 31, 2025 anogo tashi nungbosa yoktsüla.

KÉCHI SEMPET AGÜTSÜTSÜ?
Iba tetoktepba nung tajungtiba asem nem senpet yamai agütsütsü:
 Mezüng tajungtiba jenjang - Certificate den sen ₹ 20,000/-
 Tanabuba tajungtiba jenjang - Certificate den sen ₹ 15,000/-
 Tasembuba tajungtiba jenjang - Certificate den sen ₹ 10,000/-

TAYONGER: TIR YIMYIM & BOOKIPEDIA MOKOKCHUNG

NOTE
Iba sentong dak aketba maparen nung metetepelanüra imlibilema mobile number
81319 29284 & 87875 84752 nung tongtepratepangma.

ASTD Lokti Inti mungdang ayonger

Dimapur, Rongjui/Sept. 14 (TYO): Ao Senso Telungjem Dimapur (ASTD) Lokdi Inti mungdang September 16, 2025 nikongdang 4:00 ako nungi Senden Riju Kilem nung alitsü, ta ASTD tir Nungsangwaba Pongen aser tongti zülur K. Tsukti Longchar nati sangdong ka ajanga ashi.

Anungji Aor sarudoker ajak iba senden nung medema arua shilem agitsü ayongzük, ta sangdong ajanga ashi.

Iba mungdang ya talisa Senden Riju Kimong tazüng ya tarutsü nung asen Aor lanu asensor dang masü Naga nunger lanur dena ajangzüksüsa Monetization luden-i asa lendong tajung yanglua bener arua lir aser aji lokti inti-i agizüktetra tekaratiba nung mapa kuma inyaktsü tebilemba shisa lemsateptsü nukjidong nung ayongzük, ta ASTD sangdong ajangasa ashi.

State nung 3rd Quarter NLA nung ken o 461 bentetogo



Dimapur, Rongjui/Sept. 14 (TYO): Nagaland State Legal Services Authority (NSLSA) tawabangba kübok District Legal Services Authorities (DLSAs) ajanga September 13, 2025 nü Nagaland state kübok district balala nung 3rd Quarter National Lok Adalat (NLA) ayongzuka ken o 461 benteta liasü.

Ken o bentetba ya sen 5,62,48,868 indang liasü. Anogo tepiyong akaba NLA nung ken o 543 benoka jembia. Item ken o ya Pre-litigation aser pending stage nung alirtem indang lir.

Pre-litigation stage nung aliba ken o 515 nungi ken o 449 bentet aser pending cases 28 aliba nungi 12 takok ngua benteta liasü.

Ken o ya timba bank loan recovery, Telephone bills, MACT cases tem liasü.

MON: Mon District Legal Services Authority (DLSA) ajanga 3rd Quarterly National Lok Adalat ya District Court Complex, Mon nung agia liasü, kong Nokshei Kano, District & Sessions Judge, Mon-cum-Chairman, DLSA Mon aser

Wokono Yhoshii Chief Judicial Magistrate cum Secretary DLSA Mon na Presiding Officers liasü aser Conciliators ama Panel Lawyers tem liasü.

Mon nung pre-litigation bank recovery cases 39 benokba nungi sen 17,55,024 jenjang ken o 11 benteta liasü.

TUENSANG: Tuensang District Legal Services Authority ajanga 3rd Quarterly National Lok Adalat ya SBI Longkhim, Tuensang nung agia liasü.

Iba sentong ya Principal District and Sessions Judge cum Chairman Tuensang, DLSA, Somet Chumden Chang, NJS lenisüba kübok agi aser conciliators ya Retainer Lawyer, TDLSA, P.Herola aser Ayangla, Panel Lawyer TDLSA liasü.

Parnoki bank recovery cases 40 benoka jembia aser sen 3,69,900 jenjang ken o 14 benteta liasü.

KIPHIRE: Kiphire District Legal Services Authority ajanga 3rd Quarterly National Lok Adalat ya SBI Pungro Branch nung agia liasü. Iba sentong ya Holika

Sukhalu, Chief Judicial Magistrate-cum-Secretary, KDLSA lenisüba kübok agia bank nung sen apua aliba ken o 29 benoka jembia sen 42,75,700 jenjang ken o 25 benteta liasü.

ZUNHEBOTO: Zunheboto DLSA ajangfa 3rd Quarterly National Lok Adalat ya District Court Complex Zunheboto nung District & Sessions Judge cum Chairman ZDLSA, Phuleto Yephtho, NJS lenisüba kübok agia liasü.

Easter H Yephthomi aser Vilibo K. Zhimo na conciliators ama liasü aser pre-litigation bank recovery cases 15 benoka jembir sen 19,02,123 jenjang ken o 13 bentettsü.

WOKHA: Wokha District Legal Services Authority (WDLSA) ajanga 3rd National Lok Adalat ya District Court Complex, Wokha nung Seyielenuo Mezhu, District & Sessions Judge/Chairperson WDLSA lenisüba kübok agia liasü.

Iba mapang pre-litigation bank recovery cases 12 aser pending trial bank recovery ka benoka

jembia sen 22,24,621 indang ken o tembanga jembia liasü.

PHUK: Phuk DLSA ajanga 3rd Quarterly National Lok Adalat ya District Court Complex, Phuk nung Duvelu Vero, District & Session Judge cum Chairperson Phuk DLSA lenisüba kübok agi.

Sekhotso Rokha Retainer Lawyer PDLA, Vethothi Vero, Chief LADC aser Keneinu Swuro, Deputy LADC nungertem conciliators ama pre-litigation bank recovery cases 59 benoka jembia Phuk, Pfutsero, Chozuba aser Chizami nung SBI, Canara Bank aser Co-Operative Bank nungi sen 33,09,556 jenjang ken o benteta liasü.

MOKOKCHUNG: Mokokchung District Legal Services Authority (DLSA) ajanga 3rd National Lok Adalat sentong District Court Mokokchung nung Julian Sithlou, Chief Judicial Magistrate and Secretary, Mokokchung DLSA lenisüba kübok agia liasü.

Iba mapang bank loan recovery ken o 14 benoka jembir 12 bentet, Motor Accident

Claims Tribunal (MACT) ken o ka benoka bentet. Iba anogo ajak agi sen 17,12,418 jenjang ken o benteta liasü.

PEREN: Peren district nung iba sentong ya SBI Jalukie Branch, Jalukie Town nung Atoka Achumi, CJM cum Secretary PDLA lenizüba nung Video Conference ajanga agia liasü, kong Italang Ramlia (Retainer Lawyer), Kewithinwang, Idosile, Indeu aser Kidungyi Putlang (Penal Lawyer) nungertem conciliator ama pre-litigation bank recovery cases 25 benoka jembia sen 13,97,500 jenjang ken o 17 bentetja liasü.

KOHIMA: Kohima District Legal Services Authority ajanga 3rd Quarterly National Lok Adalat sentong ya District Court Kohima nung ayongzuka bank recovery cases 40 aser BSNL cases 15 agia sen 1,28,84,877 jenjang ken o benteta liasü.

DIMAPUR: Dimapur District Legal Services Authority ajanga 3rd Quarterly Lok Adalat sentong ya September 13, 2025 nü District Court Complex nung ayongzuka Longshithung Ezung, Principle District & Sessions Judge/Chairman aser Atoka Achumi, Chief Judicial Magistrate cum Secretary DDLSA lenisüba kübok agi.

Iba Adalat nung banks 24 dak tema aser MACT aser BSNL nungia shilem agia liasü. Paroki ken o 164 benoka jembir ajak bentettsü, koba sen 2,41,74,325 jenjang alitsü.

Himachal Pradesh nung tzungluruwa mongpu nung asür 394 jungogo

New Delhi, September 14 (Agencies):

Taküm tzungluruwa mongpu tenzükba sülen Himachal Pradesh nung tang tashi nung nisung 394 süogo; nisung 221 anentsüh lendong, tüzümsüng aser ki chirepba lendong nung asü aser nisung 173 gari lendong nung asü, ta Amongnü State Disaster Management Authority (SDMA)-i metetdaksü.

State Emergency Operations Centre (SEOC)-i ashiba agi, nisung 394 asüba ya tzu-mopung dak sendakba lendong balala nung asüba lir; anentsüh lendong nung nisung 48 asü, tüzümsüng lendong nung nisung 11 asü, tsüngi

lendong nung 17 asü aser nisung 38 tzu nung arakset, ta meetdaksü.

Karbo electric current agi puseta asü, kar per agi mechiseta asü, kar mi lendong nung asü aser kar lungren nung tsüka asü, ta parnokisa metetdaksü.

Iba dak alia state nung nisung 455 yiru aser nisung 41 samaogo. Tzungluruwa mongpu nungsa tüzümsüng agi kiset shiruru 2,086 aser an 26,955 ponger ao.

SDMA-i ashiba agi, state nung ki 1,576 mejungi raksa, ki 29,041 tera raksa, dokan 544, nashi ki 859 aser azü ki 1,894 raksa, ta metetdaksü.

Kiojen raksaba aser kiset shiruru samaba ajanga sen crore 4,467 jenjang takoksa nguogo.

Public Works Department (PWD)-i sen lakh 2,71,879 takoksa angu, Jal Shakti Vibhag-i sen lakh 1,38,644 aser Power Department-i sen lakh 13,946 takoksa angu.

District sasep nung nisung teimba asüba Mandi (37) lir; iba sülen Kangra (34), Kullu (31), aser Chamba (23) district tem lir.

Ketdangsertemi nüburtem dang maneni akokba tashi ainlen mesenzütsü, talisa Mandi, Kullu, Kangra aser Shimla nung ainlen mesenzütsü tekümdangtsü metetdaksü.



September 14, 2025 nü Patna nung osangbenertem senden ka nung Bihar BJP Tir, Dilip Jaiswal aser state Janata Dal (United) Tir, Umesh Singh Kushwaha na den NDA lenirtemi osangbenertem den jembidang tangokba noksa nung angur.

Maoists lenir, Pothula Padmavati-i 'surrender' süogo



Pothula Padmavati

New Delhi, September 14 (Agencies):

CPI (Maoist) nung lenir tain aser Central Committee nung züngsem, arrshi küm 62 Pothula Padmavati-i Honibarnü Telangana police matsüandag 'surrender' süogo; la tesüiba küm 40 dak tali Maoists nung liasü.

La temang tamajungba dang akümba den külemi temai adoknuba agi police matsüandag surrender asütsü telemteba agi, ta lai metetdaksü.

Padmavati dang 'Sujatha' taka ajar. La ya Central Committee nung züngsem aser taoba mapang West Bengal State Secretary of CPI (Maoist), asür Mallojula Koteswar Rao 'Kishanji' kinüngtsü liasü. 2011 küm la kinüngbu Kishanji bo West Midnapore nung police-i khaseta liasü. Tena jala ka sosema lir.

Osangbenertem den jembidang Telangana Director General of Police Jitender-i, sorkar mapatongtem aser sorkari teyari balala agütsüba

nung ajemdaker Padmavati-i Maoists telok toktsür temai adoka surrender asütsü telemteba agi, ta metetdaksü.

Police sangdong ka ajanga ashiba agi, la ya tesüiba küm 43 tashi Maoists telok nung liasü. La ya Chhattisgarh nung Dandakaranya Special Zonal Committee nung menden balala nung liasü aser 'Janathana Sarkar' nunga in-charge inyakogo. 2023 küm la Central Committee nung züngsem shima liasü.

Taküm May ita nunga Padmavati-i Central Committee member Pulluri Prasada Rao ajanga Maoists telok nungi anisüngzütsü mepishia liasü.

La ya Jogulamba Gadwal district nungi lir. La college azüngba mapang nung lai Marxist-Leninist tangatetba agizüka liasü. La mezüng Radical Students Union nung liasü, iba sülen cultural troupe Jana Natya Mandali nung aden. 1984 küm la Kishanji den kibong akümba sülen 1987 küm la kinüngbu tenaprongla Maharashtra kübok Gadchiroli nung Dandakaranya Forest Committee nung shima liasü.

Police-i Padmavati apuba mesüra tepsetba atema senpet lakh 25 agütsütsü sangdonger liasü, ajisüaka Honibarnü lai surrender asüba agi senpetji la nem agütsüogo. Lai Telangana sorkar rehabilitation policy

nungia senotsü teyari angutsü.

2025 küm kija nung Maoists 404-i surrender süogo, aser parnok rongnung State Committee member pezü, Divisional Committee secretary ka, Divisional Committee member 8 aser Area Committee member 34 densema lir.

India-Pakistan cricket asaya anema opposition-i longkak ait



Lucknow, September 14, 2025: India aser Pakistan na tsünga Asia Cup cricket match asayaba anema National Students Union of India (NSUI) züngsemtemi longkak aitdang police-i apuba noksa nung angur.

New Delhi, September 14 (Agencies):

Amongnü Dubai nung India aser Pakistan na tsünga cricket asaya asayatsü lia India tesem aika nung opposition-i longkak aitogo.

Talisa taküm April ita nung Pahalgam nung kiralongrartemi amakdang asür kinüngertemi, India-i Pakistan den cricket asayaba ya tashioksüba lir, ta aitsü.

Amongnü Lucknow nunga NSUI züngsemtemi longkak ait aser police-i longkak aiterem aika apu. Navi Mumbai nunga Shiv Sena (UBT) nung inyakertemi 'sindoor' amshia longkak ait. Shiv Sena (UBT) nung inyakertemi Jammu nunga longkak aitogo.

Delhi nung Aam Aadmi Party (AAP) nungi tetsürtemi longkak aita India nungertem dang iba asaya mereprangtsü mepishi. AAP-i Chandigarh nunga longkak aitogo.

AAP tongti lenir, Arvind Kejriwal-i X ajanga, "Pakistan den asayabaji linük anema inyakba lir, aser iba ya ajanga India nunger ajak jashir," ta metetdaksü.

AAP lenir, Manish Sisodia-ia, "Kiralongrartem den cricket asayatsüsa Operation Sindoor

milak yamai kera mekongadok asü?" ta aitsü.

Maharashtra nung Shiv Sena (UBT) party nung inyakertemi television ka tepsa aser Pakistan den cricket asayaba ya kiralongrartemi tepsetba asürtem mezügmeshiba lir, ta ashi.

Amongnü Hyderabad nung senden ka nung jembidang AIMIM tongti lenir, Asaduddin Owaisi-i, "Cricket asaya ka ajanga BCCI-i sen kwi angutsü, sen crore 2,000 asü sen crore 3,000 angutsü? Asen linük senso 26 takümji sentiba asü senji sentiba? BJP-i iba telangzübaji agütsütsüla," ta ashi.

Paissa, "BJP-i teti 'Desh Bhakti' indang jembir, ajisüaka cricket asaya dak sendakba nungbo parnoki oren melenshir," ta ashi.

Taküm Jammu & Kashmir kübok Pahalgam nung kiralongrartemi amakdang asürtem rongnung ka, Santosh Jagdale tebu, Asavari Jagdale-i, "Tanü iba asaya ya masayatsüla liasü. Ita pongu tejaklen Pahalgam amakdang nisung 26 süogo. Iba amaji ser-a BCCI-i odang asayatsü, ta bilema lira ibajibo tai," ta metetdaksü.

My Handloom My Pride

WELCOME TO

State Handloom Expo (SHE)

Hathkargha Mela

UNDER AATMNI RBHAR BHARAT UTSAV

10th to 23rd SEPT, 2025

10:30 AM TO 5:30 PM

at Urban Haat Dimapur, Nagaland

ORGANISED BY:

NAGALAND HANDLOOM & HANDICRAFTS DEVELOPMENT CORPORATION LTD. (A Govt. of Nagaland Undertaking)

DIMAPUR : NAGALAND

SPONSORED BY:

Office of the DEVELOPMENT COMMISSIONER (HANDLOOMS)

MINISTRY OF TEXTILES, GOVT. OF INDIA, NEW DELHI



TIR YIMYIM YIMOBILEM (EDITORIAL)

DIMAPUR MONDAY, SEPTEMBER (RONGJUI) 15, 2025

Tayimtsü anendak nüngdaker

Nagaland nung kanga timtem kaji tesem ajaklen gari lenmang majungba ya lir. Iba timtem ya tesadang ka asenok ochimashiba, menendakba aser pei tetsü taso lima dang nungibo asen taküm aser kibongang taoba ta aliba shisatsü aketba ajanga lir aser tanüngba timtem tesadang kaji, asenoki ochishia junga inyakaka alinük agi memelar, anungji tang amai tzünglu aruba mapang anentsü, lishitzü aser tzümetsüng alua lenmang anembanger aser anenzüka bener oa adoker. Aji oda, aonung ka kena maneni tzünglu terara arunung, Nagaland tesem ajaklen anentsü agi lenmang anembangba osang angashir aser Dimapur aser Kohima lenmangbo tangsabo meyanglutettsüsa tesem kar nungbo lenmang ajak anenzüka ogo. Iba amai aungbena anentsü agi gari lenmang nokdangba ajanga, talisa, shirangertem aika mapang shitak nung mozü ki metongteti tamajungba kumadoker aser yimti, lokti aser kija nüngdak asoshi senzütsü purtema mouteti tamakok aser takoksa angur. Atangji, timtem ka ajuruba ajanga dang kasa timtemji majurutsüsa oset yangluteter, mozü bushiteter aser lenmang nguteter. Iba kasa tangatetba nung, asenoki tanü asen lima nung gari lenmang majungba indang ya bilemdangra, atangji, mezüngbuba nung gari lenmangji anenzüka maotsüsa yanglutsüla aser anenzüka aoyonga ano tanga lenmanglen senzüa atatsüsa tanga lenmanga gari tesenzüdak lenmang tajung teti renema alitsüla, kechiyong anentsü, tzümetsüng aser yipru mopong agi lenmang lendi ka nokdangaka, nisungtemji kechisüdirsüaka tatongtsü kabo atongtsüla. Ajisüaka, ashiko ita junga lenmang meyanglutettsüsa raksatsüa akok aser iba lenmang melena jajatsüsa lenmang tanga tesadem malitsüa akok, iba ama mapang ka nung asenok asoshi alilen mekendoka anünglen jajatsübaji, tanü putu nungbo kanga tenüngdaksü kumogo. Aji oda, Nagaland nunga tayimtsü anendak ya Dimapur nung dang masü saka Kohima, Mokokchung, Tuensang aser Mon ama district headquarters nungbo kanga nendaka kumogo. Atangji, tenem lima asünungji tayimtsü tulubo mesenzütettsüa akok saka asen lima nunga nisung amentsüba dang masü khua bentettsüsa aser anentettsüsa nisung neter –tir shi amenba tayimtsü tila danga senzütettsüsa asenoki item district headquarters nung asayameyangtetra, iba jagi asenok nübortem kanga anisüngzüktsü. Akhi mapangbo, tayimtsü nung senzütettsüba takar aser tulurtem asoshi dang liasü, kechiyong tayimtsü ishika dang, anungji jenjang tasak liasü. Ajisüaka, tanü asüngbo gari aser train nung jajaba dang nungibo tayimtsü nung senzüba jenjang dalangba kumogo, iba jagi ayangertema aser kaketshirtema tayimtsü nung teimba jajar. Atangji, Kohima, Mokokchung, Tuensang aser Mon ta jembidang, tayimtsü anentsübajibo iba district headquarters nungi tatsükabo pilar asütsüa akok, saka Nagaland nung district shia ya alimang tila ka dang lir, anungji kong yangludir yangluaka district headquarters atongtsübaji tayimtsü anendak nungi ghonda ka shi dang agitsü. Aji oda, tanga yimtem nunga tayimtsü anendak nungi yimti atongtsübo ghonda ana asem tashi agir. Aji asenoki angatettsü atema, Mokokchung Airport-jia Mokokchung town meketa aliba lushitem nung tesem tetemsü melira lenden lima Tzürangkong mesüra Tuli ama nung yanglutsüa akok. Atangji, tayimtsü lenmang aser tayimtsü anendak yabo pei yim aser pei party apia masü saka kong mepet agi mesübanger aser kong tayimtsü anendang aser yimketa atutsüba mapang alilen sademsadema longa senzütettsüsa tesem tesadem tulu lir, iba ama tesemji shimteter. Iba ama tesemji Shillong aser Aizawl ama nung nguteta tayimtsü oli aruli ta senzütetra, asen lima nunga tesem aika nung tayimtsü anendakji yanglutettsü. Alemlü, oboula aser obala nunger mapang nung gari lenmang lapoktsüogo aser train-a tatsüka tashibo anir atua yutsüogo, joko tangbo asenok putu tasenba nung alirtem mapaji tayimtsü anendak yanglutsü aser district headquarters tashi train anir atua anendaktsütsübaji asütsüla. Iba yabo kijai inyakra masü, anungji Distict Planning & Development menden ama nungi tenzüksüla.

OLEMSABANG

Tanü putu nung arogotem kanga saksalema alitsüla

~ L. Kika Pongener.

(Yashi adok nungi...)

Arogo dak sendakba Ministry aser Committee-tem :

Arogo ka nung Ministry, Board, Committee, iba ama tenuk-telen kar lir, (Women Ministry, Youth Ministry, Christian Edu. Ministry, Mission Board, Evangelistic Committee, Social Concern Committee, Property Committee, Naro Committee, Choir) itemji arogo dak sendakba tenuk-telentem lir. Item ajakji arogo nukdang tajung ka-ka ser arogoji nungitra; aser pei mapa takok ngua inyakra arogoji tashi-ita alitsü. Item Ministry, Board, Committee ajaki angatettsü tongtipang kaji....Itemji arogo temang nung tenuk-telen ka-ka lir....Itemji arogo nungi pila-a balala masü; saka arogo dak sentakba telok lir. Anungji arogo dak sendakba Ministry, Board, Committee ajaki arogo dak nungi pila-a balala ama angatetra; arogoji tashi maittsü aser telemsa-a adoktsü akok. Tsüngrem o-i ashir..."Tenzükba mapa tapu aika lir, saka Kibuba ka dang. Teinyakba mapa tapu-tapu lir, saka Tsüngrem shibai ajak nung lia; ajakji inyaker paji ka dang lir" (1 Korint-12:5-6). "Kechiyong temang kechi koda ka dang sur tenuk-telen aika keter, aser temang ka dang, aji oda Khrista lir" (1 Korint-12:12). Anungji item tenuk-telen ajunga jagi Yisu Khrista atema aser arogo atema pei pei shilem inyaker. Kechiyong arogo-ji Yisu Khrista temang lir...."Aji oda, Khristai arogoji mesur aser anepalur; Kechiaser asenok pa mang tenuk-telen lir" (Efesa-5:30).

Arogo dak nungi razüka aoba telok :

Tanü putu nung arogopurtemi pei adenba lim arogo liaka, ano Para Churches, Prayer Center, Ministry, Fellowship, Homes etc. yamala mesukba aika razüka/tenzüka aoba angur. Lim arogo nung arogopurtema karbo pei adenba arogo liaka; item amala telok nungjiang oa adenba angur. Ano lim arogotem telung nunga telok-tentet nungja tapu balala jateta tenzüka oa alitsü akok. Aji oda, yamala tenzüka nukjidongji, lim arogotemi mebushijemba santem awajema bushitsü; aser mawajemba tanela wadang awajema inyaksü nukjidong nung tenzüka sudi ta bilemer. Anungji lim arogotem nungi yamala kwika razüka/tenzüka oa lir, item ajakji mungdang aser lim arogo asoshi nukdang tajung ka-ka sura kanga ajungtsü. Kokrabang, item telok-tentet ajakji mungdang aser lim arogo inyakyim tazüokba küpok asütsüla. Aji oda, item ajak jagi lim arogotem den teka amteper, Kibuba'er wadang nung pei pei shilem inyakra, ibajagi Yisu-i arogo nem nungloktsüba, tenyaba mapa, tanela anir aruba aser nutsüngsuba mapaji wadang tuluba awa-a oa inyaktettsü. Ajisuaka, item telok aser lim arogo tsüngda nung kati ka dang tajungba asütsü ta toktepba nukjidong ka dang sura; iba jagibo Tsüngrem sentsü-mewangshitsü aser arogopurtem tsüngda nung mangatettep aser telemsa-ang adoktsü; aser tashi sayutepba aser santem raktepba mapa ka dang asütsü.

Ano tanü asen lima nunga 'Satanic Church' tenzüka otsü/osang angashir, aser ashiko, karibo tenuk küli ngur alitsü sudi. Iba 'Satanic Church' yagi lanurtem aika mesuzüka, iba sulenji anidaka aoba angashir. Ano aji tang masü, tanü arogotem nung tiyazü ainkar aser tiyazü tesayur adoktsü kecha menua mali. Anungji mungdang aser lim arogotem atema kanga saksalemtsüba mapang kati menupogo. Anungji asenok tamangertem item nungji metsüktsü asoshi, laishiba kanga azüngtsüla aser laishiba den medemdanga amangtsüla...."Asenok joko tanür ama malitsü, mesura tesayuba mepong shia agi meinzütsü, mesura nisung tekülak sangrasangji agi ina oli aruli ta masütsü" (Efesa-4:14). Anungji lim arogotem ajak züba-züba alitsüba mapang masü; aser arogopurtema züba-züba amangtsüba mapang masü; kanga saksalema alitsüba mapang kati menupogo.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Christian Climate Action sentong nung shilem agir pezü apu



September 13, 2025 nü Bath, Somerset (England) nung Khristan climate change activist pezüi Bath Abbey kilemi atuba sülen 'Don't Crucify Creation' ta ozülü tuluka meyanga yuja aliba noksa nung angur.

September 14, 2025: Bath, Somerset (England) nung Khristan climate change activist pezüi ozülü tuluka meyangsü atema Bath Abbey kilemi atuba atema apu.

Christian Climate Action group nung züngsem pezü jagi tower tashi longkak aita jajaba nung shilem agiba sülen 'Don't Crucify Creation' ta zülua aliba sü meyangsü atema Bath Abbey kilem kolaki tua liasü.

Longkak aitba nung shilem agirtem rongnung ka, arrshi küm 70 Rev. Bill White-i,

climate change tebilemtsü onük atema inyaksü atema Arogo ajungshitsü asoshi iba sentong agi; Tsüngremi yangluba lima kümzüksü atema Arogoi inyaksüla, ta ashi.

Paisa, "Ni Arogo nung putir inyakba mapang nung ni kanga jangraba tesem kaji Arogo kilem kolak liasü. Kilem kolaki atuba ajanga noksa aika tejangja angur aser ajak den sendakteptsür," ta ashi.

"Tang asenok aliba alima nung temenen tulubaji climate change atema tim mesüi

inyakba ya lir. Aikati iba tebilemtsü atema inyakdar, ajisüaka asenoki iba atema kecha meinyakteter ama bilemer. Iba temenen ya rejutem aser corporate bodies ajanga lir," ta pai ashi.

"Arogo ya temeim aser ochi nung tera-yanga lir, anungji Yisu Khrista dak tasütait tanela aliba ama asenokia ola tulu agi 'Tsüngremi yangluba lima tepsetba anenang' ta shitettsüla," ta Rev. Bill White-isa metetdaksü.

Rajasthan assembly nung anti-conversion bill agizükogo

September 14, 2025: September 09, 2025 nü Rajasthan state Assembly nung Rajasthan Prohibition of Unlawful Conversion of Religion Bill, 2025 ta ser anti comaversion ozüing tasen ka agizükogo; iba ozüing kübok ozüing alema tamangba yimsü meyipdaksürtem taküm piyong tepuokdak ayutsü akok aser senchi crore 1 tashi achitsü.

Congress MLA temibo iba Bill anema longkak aita senden nungi ayazüka lua liasü.

Minister of State for Home, Jawahar Singh Bedham-i, "India linük temzüng nung Arrla 25 ajanga yimsü temeden agütsür, ajisüaka sensakertem, Dalit nungertem, tribal nisungtem, mazüing-mashirtem aser tangar memenepertem ashiokja mesüra amokmerena yimsü meyipdaksütsü atemabo temeden agüja mali," ta metetdakja liasü.

India kübok state aika nung anti conversion ozüing kübok Khristantem nem tiyazü nung tai tonglokja apur aser Khristantem anema inyaker. Khristan lenirtemi anti conversion ozüing anema court nunga ken o benoka lir.

Tawa Rajasthan nung agizükba ozüing ya taküm February ita nung benokba ozüing dangbo kanga tesashiba. Iba bill kübok ashikülak lenmang balala ajanga tamangba yimsü meyipdaksürtem küm 7 nungi küm 14 tashi tepuokdak ayutsü aser senchi lakh 5 tashi achitsü. Ano tanurtem, tetsürtem, Scheduled Castes, Scheduled Tribes nisungtem aser

matamabensartem yimsü meyipdaksüra aibelenertem küm 10 nungi 20 tashi tepuokdak ayutsü aser senchi lakh 20 tashi achitsü.

Iba dak alia khen nung nisung aika yimsü meyipdaksüba nung aibelenertembo küm 20 nungi tenzüka taküm piyong tepuokdak ayutsü aser senchi ishiba agi lakh 25 achitsü.

Ano tashiyim amshia, ashikülak ajanga aser kibong akümtsü nangzüka yimsü meyipdaksürtem taküm piyong tepuokdak ayutsü aser senchi ishiba agi lakh 30 achitsü. Ano tamangba yimsü meyipdaksütsü atema bendanglen nungi sen angurtem küm 10 nungi 20 tashi tepuokdak ayutsü aser senchi lakh 20 tashi achitsü. Ano aiben aibelener dangbo senchi lakh 50 tashi achitsü.

Iba bill kübok ozüing alema yimsü meyipdaksütsü atema amshiba kiojentem pua ayutsü atema ketdangsertem nem tashi agütsür. Aibelenba rejutem aser melungtet teloktem indang licences thinenttsütsü aser senchi crore 1 tashi achitsü.

Pei sasa melungteta tamangba yimsü melenshitsü tebilemba alirtemi ita aika jelia district magistrate nem metetdaksütsüla. Aibelenra küm 14 tashi tepuokdak ayutsü.

Iba bill kübok aibelenertem bail nung mechiochtsü aser item ken oji sessions courts nung angadangtsü.

State Assembly kima osangbenertem den jembidang Opposition lenir, Tika Ram

Jully-i, "Modi ya joko küm 11 tashi Ato kilonser inyaker, ajisüaka kechiba parnoki tang ang yimsü meyipba onük ya bilemteter. Kechiba parnoki Centre nung ozüing ka mebenoker?" ta asüngdang.

Jully-isa, Rajasthan nung "love jihad" ken o ka danga mali ta sorkari shiogo aser tesüiba küm pongu tsüingda yimsü meyipdaksüba tatalokba 13 dang lir, ta ashi.

Paisa, iba bill ya yimsü balala amangertem tsüingda adianu ama meimtepa tesünep nung aliba tensa raksatsütsü atema lir, ta aitsü.

RLD MLA, Subhash Garg-ia, tanga state tem nungbo iba ama ozüing tesashi mali, anungji kechiba asen state nungbo iba ozüing tesashi benoker? ta asüngdang.

Paisa, iba bill ya ajanga ochimashi adoktsü aser bail magütsüba ajanga tai tonglokja alirtem kanga timtemtsü, ta ashi.

Bharat Adivasi Party MLA, Thavar Chand Damor-i, "Khristan yimsü dangi meyipba tribal nisungtemji Hindu yimsü toktsürtem masü. Anungji parnok atema 'ghar wapsi' agira ibaji Hindu yimsü dangi meyipba masü saka tribal yimsü dangi meyipba asütsüla," ta ashi.

India nung anti conversion ozüing benoka aliba state 12 ji Odisha, Arunachal Pradesh, Gujarat, Chhattisgarh, Karnataka, Jharkhand, Haryana, Uttarakhand, Himachal Pradesh, Uttar Pradesh, Madhya Pradesh aser Rajasthan state tem lir.

ANOGO ABEN TSÜNGREM DEN

Tenzüktsü asoshi ozüing

Alimai nisung tajung kar bushir. Khristani sensaker, mekokminer, tsüingtsüker, nükpoker, tebur, tetsür, tanur, tain kin ajak nungi bushir. Kechiba? Kechiaser Tsüngremi ajakji aginer aser nüngdaker. Tsüngremi aginüba aser nungdakbaji bilemdangang!

Cyrene nunger Simon Yisu nüngdak dang liasü. Iba oren ya bilemtetang: Parnoki iba nisung nem kangkiji apudaktsü. Tsüngrem tenzüka mapa nung taküm agütsübaji atangji Tsüngrem asoshi züngshitsü. Asenok asoshi tongtipang mapaji Tsüngremi nüngdak dang asen taküm agütsübaji lir. Asenoki atangji pa tenzüka mapa asoshi agütsütsüla.

Edmund Burke-i ashi: "Tenzükba mapa tajung inyaksü akokba nisung tamajung kata idakji kodanga malir." Emerson i sangdong: "Alimaji nisung tajung balalai soeta alir; parnoki alimaji junga yutsür." Temaba nükjidong asoshi Khristantem temulung temerük aser bendanga agütsüba taküm alitsüla.

Bendanga agütsüba sarasadem: Kü Kibur aser Kü Tsüngrem, ni anagashitsü aser tashi angutsü ta ozüing agütsütsü aser imlatsü Na temeten ajak kar. Anungji, tanü kü sasa ne nem agütsütsü yariang. Ni nungnanga aliba nütsüing ka mesüner. Anungji kü dang yariang. Yisu tenüing nung, Amen.

Sudan nung aliba Khristantemi parnok sendokadoker ama bilemer

September 14, 2025: United Nations-i report ka ajanga, tang Sudan nung civil war ajanga nüburtem kanga timtemdar; sepai telok anati civilian amaker, tetsürtem dak tim mesüi benshir aser tongtibang kiojen aika raksatsür, ta metetdaksü.

UN Independent International Fact-Finding Mission (FFM)-i 'A War of Atrocities' ta ser sangdongba report ajanga, Sudanese Armed Forces (SAF) aser Rapid Support Forces (RSF) napronglai international ozüing alema inyaker aser taküm July ita tashi nung iba linük nung nisung million 12 prokshiogo, ta metetdaksü.

Tamangba yimsü nung ajemdaker civilian anema inyaker. Darfur nung RSF sepaitemi Arab nunger masüba nisungtem anema inyaker aser Gezira state nunga SAF-i Arab nunger masüba nisungtem anema inyaker.

Arogo nung lenirtemi Sudan nung yimsü nung ajemdaker reshikangshiba tebilemtsü lemsatepogo. August 16 nü North Khartoum nung Presbyterian pastor Peter Perpeny densema Khristan

pongu pua liasü. Parnok asüpila sentong ka nung sarasademba mapang nung apu. Sudan nung talisa bendanger Khristantem anema inyaker.

Sudan nung Arogo lenir Rafat Samir bo linük nungi jena ogo aser tang pa Khristan melungtet telok Open Doors den külemi inyaker.

Samir-i, "Arab nunger masüba Khristantem kanga reshikangshir. Sudan nung Khristantem alitsü kanga tasak. Linük nüchiso anguba mapang nungi Islamic sorkartemi Islam yimsü dak alaka tanga yimsü, tanga kin mesüra tanga oshi jembirtem magizükteter," ta ashi.

Paisa, "Sudan nung tamangertem aika ajentsüsa akümer mesüra chiyungtsü agi anüingba agi shiruru achiba chiyungtsü achitsüsa akümer. Khristantemi alimai parnok sendoker ama bilemer. Ajisüaka onoki maneni sarasademer," ta metetdaksü.

Open Doors-i 'Arise Africa campaign' tenzüka alima linüktem dang sub-Saharan Africa nung tesem balala nung jenshia aliba Khristan milllion 16.2 nungita yaritsü atema ayongzüker.

AO OSHI ANGAZÜKDAK:

TANÜ ANGAZÜKTSÜBA OJANG

Teyakyak

(v) mapa inyakyim nung tajung aser tekara (smart)

* Teyakyak nisungi dang takok tajung angur.

Teyalong

(n) teinyakdak, tejembidak (amidst)

* Onok chi chiyong teyalong nung tzunglu aru.



Tir Yimyim

OLONG PAITEP # 7271

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

- Anenzükdak ki - (5)
- Asür mangyimba - (5)
- Temulung nung shisadang - (5)
- T ___ lu - (3)
- Takdang temalen - (9)
- Tesa ___ a - (3)
- Ajungbena temulungjang - (5)
- tongtonglatsü atu - (5)
- Tejen lai nung tesayur - (5)
- Tsüngsak-mopung - (5)

LANGTSÜNGLEN

- Reprangdaksü - (4)
- ___ ur - (3)
- Kiojen yangludak - (6)
- _____ ait - (7)
- Nagaland nung ayong ka - (5)
- Küm kasa purtem - (5)
- Tetsüng tajemetdak - (6)
- ___ adenshi - (4)
- Tsünüsenbongtsü adokdak - (3)

OLONG PAITEP # 7270 TELANGZÜBA

TIPIEN :

- Kasa, 6. Rangben, 7. Mait,
- Poktet, 11. Ati, 13. Atasa,
- Rür, 17. Rajang, 20. Lanu,
- Nüngjem, 25. Süra.

LANGTSÜNGLEN :

- Khu, 2. Süjak, 3. Onük, 4. Oba,
- Anü, 6. Ratet, 7. Mozü, 8. Ita,
- Tar, 12. Tinu, 14. Salem,
- Aja,18. Anünü, 19. Tajü, 21. Ano,
- Onü, 23. Kua.

NAI-A YA METETTER

TwinMind Ear-3

ACCURACY

5.26%

Word Error Rate

12.47% Better

than Eleven Labs



SPEAKER DIARIZATION

3.8%

Diariation Error Rate

Beats Speechmatics

at 3.9%



LANGUAGE SUPPORT

140+

Languages Supported

100 More

than Otter & Deepgram



PRICING

\$0.23

per hour

Lowest Cost

among leading services



COMPETITIVE ADVANTAGE

vs Deepgram: 11.5% cheaper
vs Assembly AI: 37.8% cheaper
vs Eleven Labs: 42.5% cheaper

Key Features:
• Accurate speaker tracking
• Rich audio-event details
• Code-switching handling
• Precise timestamps

Graphics Source: Marktechpost.com

Taoba mapang Google X AI scientist aseme Ear-3 speech-recognition model ka yanglutetogo aser iba nung India aser alima atema oshi 140+ lir. Scientist aseme technology innovator TwinMind lapok aser oshi 140 rongnung Hindi, Bengali, Tamil, Telugu, Kannada, Malayalam, Marathi, Gujarati aser tangatem dena lir.

Anogoshia pei tetsü oshitem jembir mesüra oshi meyoktepa jembirtem asoshi TwinMind ajanga transcription solutions tajung agütsür.

Meghalaya honeymoon ken o nung Sonam-i bail meshir

Shillong, September 14, 2025 (Agencies): Meghalaya nung honeymoon amungdang kinungbo Raja Raghuvanshi tepsettsü tasa atong ta tai tongloka aliba Sonam Raghuvanshi-i bail petition ka agütsüogo.

Sohra sub-division nung first class judicial magistrate-i September 17, 2025 nü iba temepishiba angadangtsü ano latetogo.

Iba petition ya Hokolbarnü benok saka prosecution-i case records asadangtsü atema mapang talila meshi ta Additional Public Prosecutor Tushar Chandra-i ashi.

Iba ken o dak sendakba



Sonam Raghuvanshi

charge sheet nung metokmeperitem lir ta Sonam'er okatsürtemi ashir.

Raja Raghuvanshi ya Indore nung shishilembar ka liasü aser Weisawdong, Sohra nung

nisung aseme tepset. Raja tepsettsüba ya pa kinungtsü Sonam aser tetong Raj Kushwaha nati tasa atong ta bushisüngdangertemi ashir.

Apuani na ya taküm May ita Meghalaya nung sama aser linük ajungalen bushiteptsü tenzüik. Iba sülen Raja mang angu aser Sonam-i Uttar Pradesh nung police tsüngdang temai adok. Tatem nung Meghalaya Police-i iba ken o nung tai tonglokja alirtem ajak apu.

Taoba hopta Meghalaya Sonam, Kushwaha, aser hitmen asem- Vishal Singh Chauhan, Akash Rajput o Anand Kurmi nunger anema 790-page charge sheet ka benoka liasü.

Dr. Sentitula IFS-i “kü lima kü khu” dak ...

(TAPAK 1 NUNGI...)

“Asenok Khristian-temi asen tamang ajanga sobaliba aitokdaksütsü masü saka atalokdaksütsula. Kechiaser Tsüngremi alima nung aliba kin kidong ajak nem taso shia alitsü asoshi sobaliba tajung agüja lir”, ta ashi. Koda asen tsürabur parnok tongmelang tamang bener Tsüngremi yangluba anüng ali aser teyangluba taküm ajak temeshi ta züngshia aser Tsüngrem mulung memetet kecha meinyak, Tsüngrem mulung metettsü tsüngküm mongpu aser tatalokbatem züngdanga ali, alima nung tagitsü tasazük shitak meteta agizük aser Tsüngrem meyong kümzüka ayu. Tanüa iba kasa kulisüba tangatetbaji asen office nung, asen yimtsüng nung aser asen telemtetba ajak nung lidaksütsüla. “Kodang asenoki tejak mereprangi ochi shidir, kodang asenoki sangrasangji mesüi sensaker tenzüker, kodang aseni ochi asoshi noktaker, ibaji asen kulisüba”, ta laisa kulisüba tsütsü olen ka lemsatep.

Laisa tasüngtet lokti ka südaksünüba olen ka lemsatepdang, “ni Tsüngrem chir ka ta kodang aseni shiteter asen tebilemtsü aser khuret alima nisung meimchir kisüng tsüngdang masü, saka Teyanglur tsüngdang telangzüksü tuluba. Asen ketdangsüba ya tekülem mapa ka lir. Kechiaser tekülem aser mapa kodanga pilatsü makok. Asenoki süngdong temoktsüba ajak; aseni sayutetba taküm ajak, aseni yimyakoya angazükdaksüba ajakji tasüngtet aser temeshi mapa lir. Anungji, aseni inyakba mapa ajanga asüngtetta alitsubaji tongtibang lir”, ta metetdaksü.

“Ya temenungraba ola ka masü, saka kodang aseni asen mongjen ni kong nungi aru yimdangi arua belemtetlir, iba mapang asen khuret tali tejangjaba akümer. Süra asenok Ao officer-tem

süngbong ka langer telungjem nung, arok/külem ajungtsü asoshi alima rangben nung Ao officer-tem lungjemtsüla. Ibaji ajanga asen mangdang ulushitsü, koba ajanga asen Naga nübur aser Aor lokti tajungba nung anitsü, ajungkettsü aser pei shisatsü tajungtiba amshia tenzüksü”, ta laisa ashi. “Iba ajanga asen teinyaktsü mapa arangshidaksür, koba ajanga Aor lokti aser alima rangben asoshi apulatsütsü”, ta laisa shisem.

Laisa iba telungjem ajanga teinyaktsü kar lemsatepdang, tajungtiba asoshi tangazükdak (the Glocal Centre of Excellence) ka yanger nung ajungtsü. Ibaji ajanga asen sobaliba, tamangba yimsü aser tajangshiba kulitem nung ajemdaker libaliru, tazüokba aser shisatsü angazükba aser inyaksangshi nung techiraba koba ajanga tajungtiba ajangzüksü asoshi, yangi asenok “Shisalen Riju”, koba asen elected members-temi achayangba nung Mokokchung DPDB ajanga aser ABAM-i campus aser ki tenla-a free coaching agütsudar, kasaji tanga lima nunga tarutsü nükla yur telok kari pei nüburtem asoshi sentong tajung yanglua takok ngua inyakba kar atishia lemsatep. Iba den skill development den Research & Development Wing densema ayunung kanga ajungtsü aser ABAM Resource Centre, Aopenzu Kangtsüng nung koba amenoka lir, ibaji ABAM den angatettepa Skill Centre aküm nunga koda jangratemtsü asütsü. Yamaji asenoki küm 10 tsünga tarutsü lanu putu asoshi rongsenketzüngtsütsü Aor/Naga nunger nem renemtsütettsü takoktsü lir, ta laisa shisem.

Tanabuba nung, “digital members salang” – iba ajanga mapang aben Ao officer-tem alima rangben nung alirtem pei lima yanglutsü asoshi tebilemba,

tangatetba aser teyaritep lemsateptsü. Tasembuba nung, “TED (Technology Entertainment & Design) Talk” – ita shia khenbo Mokokchung town hall nung TED talk alitsü aser yangji asen officer-tem rongnungi kadi Jembitsü aser Mokokchung district nung school, college aser rijutem nungi tajungtibatem dendaksü nung ajungtsü, ta laisa ashi.

Pezübuba nung, “Leadership Summit” - küm nung khen lenirtem asoshi tematiba senden alitsü aser iba senden nung asenok rongnung shisatsü nung techiratem anidena asen lima tang aser tarutsü asoshi jenjang yanglutsü atema shisatokden akatsü. Pungububa nung, küm nung noklang (100) dak tema Aor lanurtem “digital” aser “AI skill” nung anitettsü. Tanü lanu putu maparen balala nung shilem agitettsü asoshi tabensaba nung Ao officer-tem telungjem ajanga renemtsütettsü, ta laisa ashi. Trokbuba nung, lokti teyaritep ajanga sentet rateta yoktsü (community led start ups). Iba dak sentakba nung Ao officer-temi achayanga Aor yimtsüng shia nungi nisung 2 bosa/küm nung pei tejangraba nung angazüksü tim angazüktetba aser lenmang balala bushiteta sentet rateta yok nung ajungtsü, ta laisa metetdaksü.

“Ibai pungmang ka dang masü, ibai asenok ajaki khuret bena talangka nungi asen lima yanglushitsü asoshi jembia aruba teinyaktsü khu. Ibai nisung ka kisüngi abenba khu ka masü, asen otsüla oboula nunger mapang nungia inti lungjemer mangdang ka; ola ka; tebilemba ka nung bener noktak. Tanüa asenok külemi lungjemer tangatetba aser temiem nung pongbapongba abentsü kü lima kü khu lir”, ta laisa tayongzükba ka agüja o tembang.

Gaza rara jembishinütsü atema Marco Rubio Israel tongogo

Jerusalem, Rongjui/Sept. 14 (Agencies): United States Secretary of State Marco Rubio Israel tonga aruogo, kong pai Ato Kilonser Benjamin Netanyahu ajurutsü, kechiaser taoba hopta Israel-i Qatar amakba mechi Middle East nung tensa mejungi kuma lira ser Arab-Islamic summit ajungben senden ka Hombarnü Doha nung amentsü aser Israel-i tanen makai Gaza raksatsür.

Qatar yimtiba nung Israel-i Hamas lenirtem dak amakba nung tamakok ajurua US Tir Donald Trump-i aitsüba sülen Rubio-i Deobarnü Israel atong. Israel-i apusoa maodang, Doha nung amakba atema Trump mepelar saka iba yagi Israel nunger den asen tesendaktep memelenshitsü, ta Rubio-i osangbener dang shia liasü.

Ajisüaka paisa ibaji ajanga Israel-i Gaza nung raraba anena alitsü merangba nung kongshiba indang US aser Israel jembitsü ta ashi.

"Tiri iba ya renemdaktsüner. Renemdaktsüner ta asüba tetetzü pua alir nisung 48 prong khi nung chiochtsüba. Hamas ya joko tetsübotsü mali, anungji asenoki phase tasenba nung meraloka aotsü, aser ibaji Gaza

koma yanglushitsü?" ta pai ashi. "Komaser security agütsütsü? Komasür Hamas ya kodanga meyipa meshilangtsü? Tiri yangji temulung agütsür... Aser taoba hopta Qatar nung atalokba ajanga yangji koba tashi kongshir ta asüba indang onoki jembishinütsü."

Shibai aji inyaktsü, iba atema shibai taa agütsütsü aser inyakyim shir lenisüba nung inyaktsü, itemji ano mejangja, ta Rubio-i ashi.

Rubio-i Honibarnü X nung pai Israel nung oa pua alirtem meyipa shilangba, humanitarian aid tem civilian nem agütsütsü aser Hamas ajanga tebilemtsü agütsüba nung ranglochtsü, ta shia liasü.

Gaza nung ceasefire alitsü sentong tasen ka US-i benokba jembishinütsü atema Hamas lenirtem Qatar nung adenshia lia Israel-i amakba nung lenirtembo kata masü saka Qatar security officer ka densema nisung trok tepset. Qatar ya NATO züngsem mesüaka US asoshi tongtipang tembar linük ka lir.

US ketdangsür temi iba ya linük kati rara ka nung takok angutsü mechi inyakba lir aser ya US mesüra Israel tejangraba masü ta ashir.

Qatar yimtiba nung amakba asoshi danga Arab linüktemi kanga sashia aitsü aser Qatar tetsüngtai ia ceasefire ken o jembia aliba raksa.

Hamas-ia Israel nungi pua bener oa alir ajunga chiochtsü aser Gaza amokbanga aliba tashi interim Palestinian administration nem agütsütsü mulunga lir, ajisüaka iba melen rara anentsüla aser Gaza nungi Israel sepai ajunga ainshitsüla ta ashir.

Kasa mapang Netanyahu-i Gaza nung alir ajunga meindoktsü ayongzüker aser occupied West Bank nung 'settlement expansion plan' tenzüchtsü asoshi Brehostibarnü agreement ka zülutep, koba ajanga tarutsü nung Palestine nunger linük ka alitsü tamakoktsü akumtsü.

Hokulbarnü United Nations General Assembly nung two-state solution asendenshitsü bhukuma vote agütsü, saka Israel-i khenyongi memulunger.

Israel-i Gaza aser West Bank nung raraba tejashi Israel tembar France aser United Kingdom den anüolen linük kari tan ita UN senden nung Palestine ya linük ka ama agizüka sangdongtsü renema lir.

Ukraine-i drone amshia Russia indang refinery amak



Moscow, Rongjui/September 14 (Agencies): Ukraine-i manger mesangwa tsüngda drone 361 amshia Russia makogo aser iba mapang Russia northwest len Kirishi oil refinery nung mi adoka liasü, ta Russia nunger ketdangsürtemi metetdachtsü. Lendong nung nisung asüba mesüra yiruba kecha mali, ta parnokisa ashi.

Alima rara tanabuba sülen Europe nung tang rara tulutiba ya kodaser anendaktsütsü ta tashi tait linüktem sensaksema mapang drone amshia rara tamajungba küma odar, aser Russia nunger indang drone tem NATO züngsem Poland nung khazüka yokogo aser Ukraine-i Russia nung oil refinery aser pipeline tem maka arudar. Russia ya alima nung totzü exporter asürtem tulutiba rongnung tanabuba lir.

Russia indang defence ministry-i ashiba agi, Russian air defence system temi guided aerial bomb pezü aser U.S.-made HIMARS missile ka densema drone 361 khazüka yokogo. Ajisüaka parnoki koba tesemsa amak iba indang osang tejangja magütsü.

Surgutneftegaz indang (S N G S . M M) , Kirishinefteorgsintez refinery, koba Russia nung refinery tongtibang ana rongnung ka lir, iba ya Ukraine indang drone tem agi maka liasü, ta Russia nunger ketdangsürtemi metetdachtsü.

Leningrad tesem governor Alexander Drozdenko-i ashiba agi, Kirishi tesem nung drone asem raksatsü aser drone terkasa agi mi adokdachtsüba temsepja liasü. Paisa, nisung shinga miyiru ta ashi.

Ukraine indang drone

command-ia, parnoki iba refinery ya kanga takok ngua makogo, ta ashi.

Kirishi nung kümshia totzü 17.7 million metric tons (anogoshia barrel 355,000) asüngteter, koba linük indang totzü shilem 6.4 asütsü.

Ukraine den rara anendaktsütsü atema nongshitsü asoshi Russia indang rongsen leman shibangtsütsü atema hopta tsüngda United States NATO linüktem dang Russia nem energy dak sendakba nung tenokdangba tali agütsütsü nongshia arudar.

Trump-i Honibarnü ashiba agi, Russia nem tenokdangba tasen agütsütsü atema US renemdar, saka NATO linüktemi Russia dang nungi totzü aliba anena kasa jenjang agi nungdang parnoki iba tenokdangba agütsütsü ta ashi.

AO KAKETSHIR TELONGJEM

Dimapur Govt . College
Raffle Draw In Aid of Golden Jubilee
RESULT :

1st prize Sl. no. 3213.
2nd Prize Sl. no. 1661
3rd Prize Sl. No. 8338
Consolation prizes : Sl. Nos. 0136: 3706; 2388; 8274; 8436.
Iba osang adokba anogo nungi zünga anogo 14 tsüngda iba raffle nung adokertemi AKTDGC ketdangpurtem ket nung pei meyong senpet original ticket bener arua agizükangma .
Tongtepratepdak mobile number 7627942037 / 9863850164.

**Sd/-
Planning Committee,
Golden Jubilee,
AKTDGC. Dimapur.**

Nepal azütokshi lendong nung asür 72 jungogo

Kathmandu, Rongjui/September 14 (Agencies): Nepal nung taoba hopta ochi mashi inyakyim anema longkak aiba mapang asür nisung 72 jungogo, ta linük indang health ministry-i Deobarnü metetdachtsü. Mepetmesü adokba mapang raksatsüba shopping mall aser tanga kitem nungi teküzmükertemi maneni tasü mangtem agitetdar.

"Shopping mall aser tanga kitem koba mi senokja rongtoktsü mesüra maka liasü, item kitem nungi tasü mangtem ngutetdar," ta health ministry otongdar Prakash Budathoki-i ashi.

Ministry sangdong ajangasa iba mepetmesü lendong, koba küm aika tsüngda tamajungtiba liasü, iba lendong nung nisung 2,113 yiruba metetdachtsüogo.

Longkak aitertemi sorkar kitem aser linük indang supreme court, parliament building, police post tem aser shishilembadak balala den tir Ramchandra Paudel aser Ato Kilonser K.P. Sharma Oli nunger ki densema yimden yimsüsürtem ki aika rongtoktsüogo.

Linük kanga mesüngjemteti akümba sülen PM Oli-i pa mapa toktsü aser taoba Chief Justice Sushila Karki interim PM asütsü shimogo, aser la lenisüba nung taruba küm March 5 nü linük election agitsü.

Tir Paudel, army chief Ashok Raj Sigdel aser longkak aiter lenirtem tsüngda anogo ana tashi sensak asema sülen Karki ya interim Ato Kilonser asütsü shima liasü.

Social media tenokdangba agütsüba atema iba longkak aitba ya tenzü, saka lia lia ochi mashi inyakyim aser yimden yimsüsürtem yongtsüng nung tejak repranga maongka balala agütsütepba anema nüburtemi nokdak tenzü. Parnoki parliament, yimden yimsüsürtem ki aser public kitem nung mi senoktsü aser Ato Kilonser KP Sharma Oli kangshia mapa nungi anendakja liasü.

Linük kübok tepuokdak balala nungi jena aoba tepuoker 1000 shi meyipa ogo, saka ano tepuoker 12,500 dak tema jenshia senzüdar, ta police-i ashi.

Rongsenketzüng nung timtem aliba aser yimden yimsüsürtem aser parnok chirnurtem kanga ka-ita litepba mapang tanungba purtem kanga kangshitepba agi Nepali nunger longkak aitertem kanga temulung mesüi liasü.

Lanurtem aikati, mapa manguba aser talisa yimda yimtsüngtem nung tinyaktsü maliba ajanga kanga temulung masüba lemsatepogo, iba ajanga nisung aika Middle East, South Korea aser Malaysia nungeri mapa inyaki aoer.

Afghan arütsü anasa Pakistan sepai 19 aser TTP züngsem 45 süogo

Islamabad, Rongjui/Sept. 14 (Agencies): Afghanistan arütsü anasa kanga sashia aiben khatepba mapang Pakistan security forces temi Tehrik-i-Taliban Pakistan (TTP) züngsem 45 tepset saka parnoka 19 takum sama.

Anogo ishika tsüngta khatepba ya Pakistan northwestern provinces tem nung TTP atsükoka aliba tesemtem amakba ajanga lir, koba ajanga Pakistan-i telungpur tebilemtsü maziüktetba sayur.

Honibarnü Pakistan mitkar indang sangdong ka nung ashiba agi, operations ya Khyber Pakhtunkhwa province indang Bajaur, Lower Dir aser Sourg Waziristan district tem nung agia liasü.

Bajaur nung mezüng amakdang telungpur 22 tepset ta mitkari ashi. Ano South Waziristan nung operation balaka agiba mapanga nisung 13 asü aser Lower Dir area nung raradang telungpur 10 tepset. TTP ya balaka saka Afghanistan nung tang yimsü tesüdak Taliban

den tesendaktep tajung aliba telok ka lir, aser parnoki azüdokshi kar tenüng agia liasü.

South Waziristan nung Pakistan sepai 12 asüba aser Lower Dir nung khatepdang tenet asüba ajanga kanga sashia raraba aser Pakistan nung security tebilemtsü sayur.

Item tesemtem amakba ya Afghanistan nung TTP telok jenoka aliba tesemtem samatsütsü asoshi military campaign tuluba nung shilem ka lir ta Pakistan-i ashir, kong telungpur temi mapang shia arütsü alema aita amaker. Pakistan sorkari Afghan Taliban dang TTP anema mera agitsü ajungshia arur, saka Kabul-i par linük nung telungpur mali ta ashir.

Küm ishika tsüngta azüdokshi timba akumba, talisa 2021 küm nungi Afghan Taliban-i Afghanistan nung yimsü asü tenzü, koba ajanga ano maneni arütsülen tesemtem kanga mejungi kumogo. Taliban-i takok anguba ajanga TTP temulung ulushidachtsü.

World Boxing C'ships: Minakshi-i gold medal angu



Rongjui/September 14, 2025 (Agencies): Liverpool nung tang asaya aliba World Boxing Championships nung Minakshi Hooda-i Deobarnü India atema tanabuba gold medal nguogo.

Arishi kum 24 tain asayar yagi final nung Kazakhstan tsür Paris Olympics nung bronze medalist Nazym Kyzaibay 4-1 agi koka liasü. Tena final asaya ya Astana nung World Cup final asayashiba mesüka liasü,

koba Kyzaibay-i koker liasü.

Minakshi ya Rurki nung auto-rickshaw driver ka jala lir. La ya Indo-Tibetan Border Police (ITBP) constable ka lir, aser lai tang tashi nung asayba international asayamung ajak nung medal ngua arudar.

Taoba Asian Championships aser World Cup silver medalist yagi M&S Bank Arena nung 48kg semifinal nung Mongolia tsür aser 2023 World

Championships runner-up Lutsaikhany Altantsetse 5-0 agi koka liasü. 48kg category ya non-Olympic weight class ka lir.

Kasa asayamung nungsa India tsür Jaismine Lamboria-i (tetsür 57kg) Honibarnü final nung Poland tsür Szermeta Julia 4-1 agi koka liasü.

2024 kum Paris Olympic nung silver medallist Szermeta-i asaya kanga kara tenzük aser counter-attacking kanga junga süa asaya. Ajisüaka iba ajanga Jaismine rongmesodaktsü, shibai tanabuba round nungibo asaya amokbanger asaya liasü. Lai la tar talangba asüba maongka agia asaya azüok aser 4-1 agi koka liasü.

Maneni 80kg+ category nung Nupur-i silver medal nguogo. Final asaya nung lai Poland tsür Agata Kaczmarska makok. Iba asaya ya Poland tsürla yagi 3-2 ta split decision agi koka liasü.

Tetsür asaya nungsa Emily Asquith-i 80kg category nung India tsür Pooja Rani 4-1 agi koka final tongtetogo. Asquith Hombarnü final asayatsü. Asaya makokba sülen Pooja-ia bronze medal ka ngutetogo.

India team nung Sunil Chhetri züngoksemogo



Rongjui/September 14, 2025 (Agencies): India tebur team head coach Khalid Jamil-i Deobarnü October FIFA International Window atema asayar shimtsü asoshi asayar 30 shimdangher aliba sangdongogo.

Preparatory camp ya September 20 nü Bengaluru nung tenzüksü aser asayartem anogo ka jelia yimti nung adenshitsü.

India nunger nungtugu football asayar Sunil Chhetri-a iba team nung züngoksemogo. CAFA Nations Cup atema Jamil-i Chhetri meshim aser iba mapang ashiba agi, iba asayamung ya October ita Asian Cup qualifiers atema renemshiba asayamung ka dang lir.

Chhetri-i taoba kum June ita Kuwait den asayaba sülen international asaya nungi anen, saka head coach Manolo Marquez-i Asian Cup qualifiers

tasembuba round nung team nem teyari agütsütsü atema mepeshiba sülen Chhetri asayashi tenzük aser March ita Maldives den mezüng asaya liasü. Iba sülen pa India team nungi pezüben asayaago aser Maldives goal 3-0 agi akokba asaya nung goal ka idakja liasü.

Mohun Bagan SG aser FC Goa nungi asayartem shirnok probables squad nung züngoksemogo, parnok AFC Champions League Two asayaba sülen team nung adentsü.

Iba dak alaka ano asayar pongu standby nung yau lir. Asayartem ya U23 men's national team nungi ana aser senior asayar asem lir.

AFC Asian Cup 2027 Qualifiers Group C nung tatembangbuba Round nung asaya ana atema renemshia atatsü asoshi iba camp ya

ayongzükogo. India team October 9 nü Singapore den National Stadium, Singapore nung asayatsü aser October 14 nü Pandit Jawaharlal Nehru Stadium, Margao nung asayatsü. Singapore den asayatsü atema tatembangbuba squad ya tang shimdangher aliba asayartem rongnungi shimtsü.

October FIFA International Window atema asayar 30 shimdangher alirtemji yamai alitsü:

Goalkeepers: Amrinder Singh, Gurmeet Singh, Gurpreet Singh Sandhu.

Defenders: Anwar Ali, Bikash Yumnam, Chinglensana Singh Konsham, Hmingthanmawia Ralte, Muhammed Uvais, Pramveer, Rahul Bheke, Ricky Meetei Haobam, Roshan Singh Naorem.

Midfielders: Ashique Kuruniyan, Danish Farooq Bhat, Jeakson Singh Thounaojam, Jithin MS, Macarton Louis Nickson, Mahesh Singh Naorem, Mohammed Aimen, Nikhil Prabhu, Suresh Singh Wangjam, Vibin Mohanan.

Forwards: Irfan Yadwad, Lallianzuala Chhangte, Manvir Singh (jr), Mohammed Sanan K, Muhammed Suhail, Parthib Gogoi, Sunil Chhetri, Vikram Partap Singh.

Head Coach: Khalid Jamil.

Hong Kong Open: Satwik & Chirag nati final mekoktet

Rongjui/September 14, 2025 (Agencies): India nunger badminton tebur tarep asayar Satwiksairaj Rankireddy aser Chirag Shetty nati Deobarnü Hong Kong Open tebur tarep asaya final nung China nunger tarep Liang Weikeng aser Wang Chang na mekoki tanabuba jenjang nung tembangogo.

Final asaya nung Weikeng aser Chang nati game ka mekoki aliba nungi meyipa tur asaya ya 19-21, 21-14, 21-17 agi akoka liasü.

Satwik aser Chirag nati final asaya nung mezüngbuba game ya 21-19 agi koka liasü. Asaya tatemsü lia tena point ana agi tajemba liasü saka kanga meranga asayar asaya akok.

Ajisüaka tanabuba game nungbo China nunger tarep yagi kanga junga angatettepa asaya-a asaya 21-14 agi akok aser ibayongji deciding third set asayatsüsa aküm, koba Chang aser Wikang nati 21-17 agi koka liasü.

Satwik aser Chirag na 2024 kum May ita sülen Deobarnü mezüngbuba final asayaago. 2024 kum May ita tenati Thailand Open final nung Chinese Taipei nunger tarep Chen Cheng Kuan aser Lin Bing-wei na 21-17, 21-15 agi

minute 38 nung ayong ayonga koka liasü.

Hong Kong Open akoktsü atema Satwik aser Chirag na jakdang China nunger tarep sixth seeds Liang Wei Keng aser Wang Chang na liasü. Tena ya Satwik aser Chirag nati World Championships nung round of 16 nung koker liasü.

Ajisüaka China nunger tarep yagi taoba mapang aibelen nungi angazüka India nunger tarep ya tetenzük nungi merenshia asaya saka mezüngbuba game makok, ajisüaka iba sülen tanbuba aser tasembuba set nungbo asaya amokbanger asaya-a asaya koka liasü.

Kasa asayamung tebur kija asaya nung India nunger asayar Lakshya Sen-ia China nunger asayar Li Shi Feng mekoki tanabuba jenjang nung tembangogo.

Deobarnü tebur kija final asaya ya Feng-i 15-21, 12-21 agi minute 45 nung koka liasü.

Taoba kum November ita Syed Modi Super 300 nung final tonga asayaba sülen Sen tang mezüngbuba final ka tonga asayaago aser 2023 Canada Open akokba sülen pai tang tashi nung Super 500 title ka danga bena mali.

ParaAthletics C'ships nung Paris Paralympics medallist 100 dak temai shilem agitsü

New Delhi, Rongjui/September 14 (Agencies): Taküm World Para Athletics Championships September 27 nungi October 5 tashi Jawaharlal Nehru Stadium, New Delhi nung asayatsü lir, koba otsüsütsüka asütsü.

Iba asayamung nung linük 104 nungi asayar aser support staff 2,200 dak temai shilem agitsü aser asayartem medal atema asaya 186 nung tokteptsü, koba India nung para asayamung tulutiba asütsü.

Iba asayamung ya kanga jangrademtsüka asütsü, kechiyong Paris Paralympics nung medal angur 100 dak temai iba asayamung nung shilem agitsü. Item asayartem yagi Paris Paralympics nung gold 112, silver 96 aser bronze 100 ta ajak senteper medal 308 nguogo aser taküma iba asayamung nung tokteptsü renema lir.

Iba asayamung ya tang

mezüngbuba India nung ayongzüka asayatsü lir aser taküm nungibo medal asaya 186 asayatsü, koba Kobe nung asayaba mapangbo tebur asayar 101, tetsür asayar 84 aser temeyoktep asaya ka densema asaya 101 dang liasü.

Asayamung nung shilem agitsü aliba nungtugu asayartem rongnung Germany nunger asayar Markus Rehm densema lir, shiba-i men's long jump T64 nung Paralympic nung pezüben aser aser world champion nung tenetben takok ngua lir.

Rehm dang ya Blade Jumper ta ajar aser pai world record ka yanglua lir, koba ajanga iba aso nung Olympic gold medal jump dena ajatetogo.

India nunger rongnungi Paralympic gold medallist aser tebur Javelin F64 nung defending WPAC champion Sumit Antil nunger amala asayartemi shilem agiba angutsü.

BILEMDANGANG

"Konang tetushi ajemalua agizüktetang."